


't Herenhoentien



BESTE KIENDER!

Wi'j vieren vandaege een betien feest!
En weten jim wel waaromme? Nee? Now, dan
zullen we dat gauw vertellen. Dit Herenhoentien is et
eerste Herenhoentien in et zesde jaor. Dat betekent dat et kraantien al vuuf jaor bi'j jim op
schoele komt. Eerst kregen alliend de kiender van groep 1 en 2 et blattien, mar laeter ok groep
3. En... van now of an dot groep 4 ok mit! Hatstikke mooi! En omdat wi'j mit mekere feest
vieren, gaon jim in dit Herenhoentien mit oons mit naor et cirkus. Op drie inlegvellen zien jim
allegere clowns en een cirkustentien. As jim de bi'jheurende uutleg op die inlegvellen
opvolgen, kun jim daor een prachtige mobile van maeken. Van et vierde inlegvel kan een hiel
mooi clownsdeusien vouwd wodden. Vanzels moe'n jim alles eerst hiel mooi kleuren! Midden
in et kraantien staot weer een verhael over Piepmoes. Hi'j gaot mit zien vrunden naor et cirkus,
luuster of lees mar gauw.



Hier vlak naost ziej' een wekker mit mooie
wiezers d'r op. Dat hewwe niet zomar daon!
Zundag 27 oktober is de zommertied veur-
bi'j en dan moe'n de klokken morgens om
4 ure een ure weeromme zet wodden. Dat
betekent dat et dan 3 ure is. Et betekent ok
dat et aovens een ure eerder donker is. We
zitten tegen die tied al weer midden in de
haast. Aovens lekker gezellig vroeg de ge-
dienen dichte en de laampen an, wi'j heb-
ben d'r wel weer zin in, jim ok? Wi'j hopen
dat jim in elk geval een slim gezellige tied
hebben zullen mit et circusherenhoentien
van dit keer. Et volgende kraantien komt
om vuuf december henne uut en staot bas-
tensvol verhaelties, spullegies en zo die mit
de wintertied te maeken hebben. Tot dan!

't Herenhoentien is veural bedoeld veur
de eerste vier groepen van et basisonderwies.

PIEPMOES EN ET CIRKUS

(Een veurleesverhael van Sietske Bloemhoff)

Et wodt al een betien schiemerig as Piepmoes de deure aachter him dichte trekt. 'Tjonge,' mompelt de moes in himzels, 'wat duustert et aovens al hadde an. Ie kun wel weten dat de klokke zundag een ure weeromme zet is. Mar goed da'k de zaklanteern in de buse steuken heb. A'k weer op huus an gao, kan ik die wel bruken.' De moes lopt de tuun deur naor de bos toe. Daor staot de molle al op him te waachten. Tegere lopen ze veerder. As ze op de eupen plak ankommen, bin daor al veul meer dieren.

'Even de koppen tellen,' zegt de doeve. 'Awe d'r allegere binnen, kuwwe vot.' As de doeve drok an et tellen is, komt d'r nog een voegel hadde an vliegen. Et is vanzels die eigenwieze protter. Hi'j is altied en iewig et laeste, hi'j mient now ienkeer dat hi'j alle tied van de wereld het. Mar goed, daor hewwe et laeter nog wel es over. Iederiene is d'r en de beesten gaon op weg. Za'k jim vertellen wie d'r allegere mit gaon? Now, Piepmoes en de molle vanzels, de doeve, de protter, de beide honnen Diedel en Daweltien, de gelegouw en et roodbossien.

As de acht dierevrunden een schoffien onderwegens binnen, zien ze in de veerte de lochies in et dörp al branen. Op een groot stok laand vlakbi'j et dörp bin nog veul meer lochies en d'r staot een grote tente. Een tente mit allegere prachtige kleurige strepen en een peer vlaggen d'r veur en d'r bovenop. 'Hebben jim ok zoe'n nocht an et cirkus?' kwettert et roodbossien uutgelaoten. 'Ikke wel,' antwoordt de doeve. 'Ik bin toch zo beni'jd of d'r ok een goecheler is, die doeven of knienen uut een hoge hoed toveren kan!' 'Misschien bin d'r wel honnen die keunsies kunnen,' blaffen Diedel en Daweltien. Van poere wille dukelt Diedel een peer keer over de kop en perbeert Daweltien op zien veurpoties te lopen. Dat gaot vanzels hatstikke mis en de beide honnen roegelen slop van et lachen over mekeer henne. De ere dieren schuddekoppen bi'j et zien van die malle meneuvels van de honnen.

Intied bin ze bi'j et cirkus ankommen. De doeve kocht acht kaorties en de beesten zuken een mooi plakken op. De tente zit smoorvol as de cirkusdirekteur iederiene welkom hiet en een plezierige aovend toeweenskt. Et speктаokel kan beginnen. Iederiene geniet volop. D'r is van alles te zien. Akrebaoten, daansende peerden, een hieleboel clowns, tiegers, trapezewarkers, olifanten, een goecheler en gao zo mar deur. Et is prachtig mooi, warkelik waar!

Buten de tente is et stille, krek as in de bos. De meeste dieren bin ja naor et cirkus. Bi'j de boerkeri'je is et ok stille. Temeensen... Scharrelt daor toch niet wat omme? D'r konnen werempeld wel goenend lopen, luuster mar es! En wodt daor ok niet praot?

Now ja, praot... Et het meer van gemierk. Van lélk gemierk. Ja, heur, et bin de katten. Et bin Klaos en Miep en ze bin raozend op mekeer. 'Wat waj' weer stom an de gang, Klaos,' mierkt Miep.

'Wat bi'j' toch ok een domme eigenwieze kaeter. Deur al dat gedoe van jow zitten wi'j now hier, in plak van in et cirkus. Iederiene is d'r henne, Piepmoes ok!

Koekebakker daj' ok binnen!' Tjonge, wat is die Miep alderheiselikste kwaod op Klaos de kaeter.

'Eerst kwak ie een vase mit bloemen ondersteboven, en dan laoj' je nog opsluten ok.' Miep zemelt zo

nog een posien deur; wat het die katte de smoor in. 'Now,'

jammert Klaos, 'ik kon et eers niet helpen, heur! Ik zol een vliege

pakken en doe sprong ik bi'j ongelok midden in de vase mit bloemen. En ik

schrok zo, da'k hielendal niet in de gaten had, dat de vrouw aachter mi'j ston en me greep. Ik

had ok graeg naor et cirkus wild, aj' dat mar weten.' Aarme Klaos het de traonen d'r haost van

in de ogen, zoe'n spiet het hi'j. Miep foetert nog een posien op Klaos omme. Dat Miep deur

al dat waeter uut de vase ok nat wodden is. En dat Klaos een grote sukkel is. En dat hi'j beter

beter moezen vangen kan in plak van vliegen. Die kuj' temeensen opeten. Now ja, vliegen ok wel, mar daor zit toch gien reuk of smaek an! Et is ja niks vergeleken mit een lekker smaekzem moesien!

Dan hooft de katte him inienend stille en stikt een potien omhogens. 'Mar ie kun et goedmaeken,' gaot Miep veerder, 'luuster mar naor mi'j. Douk is et cirkus oflopen en dan gaot iederiene weer op huus an. Piepmoes ok. As wi'j oons now es bi'j et pattien in de bos...' daenkt de katte hadde-op. 'As wi'j oons now es...' 'Ja,' kan Klaos niet naolaoten te zeggen, 'dat zeej' krek ok al. Ik mag dan wel es wat ommesmieten, mar ie zeggen alles wel honderd keer!' Miep kikt Klaos es gremietig an, mar vertelt dan over zien plannen om Piepmoes te griepen. 'Mar we moe'n wel opschieten,' gaot Miep veerder, 'want et is al haost bi'j tien, en dan hooft et cirkus op.' De katten maeken dat ze bi'j et pattien kommen en verstoppen heur aachter een dikke boom. Nao een posien waachten fluustert Klaos: 'Hoe lange duurt et nog, Miep?' 'Hi'j zal zo wel kommen, Klaos,' antwoordt Miep. 'Nao nóg een posien fluustert Klaos weer: 'Hoe lange duurt et now nog, Miep?' 'Geduld, Klaos, et duurt vast niet lange meer,' mient Miep, 'et is al haost kwat over tiene.' Wéér even laeter jeuzelt Klaos dat et toch wel slim lange duurt en dat hi'j koolde poties krigt. 'Hooft toch op van zeuren,' waarschouwt Miep, 'volholen!' Om kwat veur elf stapt Klaos liekewel overaende en zegt dat Miep om him de krits kriegen kan, mar dat hi'j op huus an gaot. Et wodt ja toch niks, Piepmoes is vast een eer pattien daele gaon. En vot stapt Klaos. Miep zwiepstat nog een peer keer, mar besluit om ok mar naor huus toe te gaon. De katte snapt d'r niks van. Et is haost elf ure, en nóg is d'r gieniene te zien. Een vremde boel. Klaos zal wel geliek hebben, die verhipte moes zal wel argens eers langes gaon wezen.

As ze goed en wel in heur kórfies in de stal liggen, heuren ze de dörpsklokke slaon. Et is al elf ure, tel mar mit. Iene, twee, drie, viere, vufe, zesse, zeuven, achte, negen, tiene, e... Mar d'r komt gien elfde keer! 'Hoe kan dat now,' mauwkt Miep, 'waor blift de elfde slag?' Dan wo'n Klaos zien ogen hiel groot en beginnen zien snorhaoren te trillen. 'Wie is hier now aenlik en sukkel,' begint hi'j te poesten. Ie bin zéls een sloegerd en een koekebakker, Miep! Oflopen zundag is de wintertied ingaon. Et is dus now nog mar tien ure. Mar now hoeven we vanzels niet meer aachter Piepmoes an te gaon. As wi'j bi'j et pattien binnen, is hi'j al twee laank en twee bried thuus. Now moej' vanzels nóóit weer wat van mi'j zeggen, want dit is wel zo allemachtige stom. En ik luuster de eerste tied ok niet weer naor jow, daor hoej' niet op te rekenen!' Miep kan himzels wel wat doen. De katte hooft twee poties veur de oren om Klaos zien gebrom mar niet te heuren. Oei, oei, oei...

En Piepmoes-en-die? Die hebben de aovend van heur leven had, et cirkus was toch zo hatstikke mooi! Mar ien ding begriepen ze niet. En dat is waor Klaos en Miep aenlik weren...



KLOKKESPULKLOKKESPULKLOKKESPULKLOKKESPULKLOKKESPULKLOKKESPUL

Op de aachterkaante van dit Herenhoentien staot een klokkespul. Et gaot d'r omme wie as et eerste bi'j de belle is. Ie kun et spullegien mit ien of meer kiender speulen. Hoe as et percies moet? Now, zo:

Gooi eerst ombeurten mit een dobbelstien. Degene die et hoogste tal ogen gooit, mag beginnen. Begin bi'j et vakkien mit de 1 d'r in en gao vervolgens mit de klokke mit. Aj' in een vakkien zonder ciefer kommen, hoej' niks te doen. Aj' in een vakkien mit een ciefer kommen, wel! Bi'j elk ciefertien heurt een bepaalde opdracht. Bi'j et spullegien zels kuj' lezen wat veur opdrachten as dat binnen.

Veul plezier!


KLOKKESPUL

De opdrachten:

1. Gooi nog een keer.
2. Waacht 2 beurten en gao dan veerder.
3. Gao 3 vakkies veerder.
4. Knipoog 4 keer naor iene van de ere speulders.
5. Ie meugen pas veerder aj' een 5 gooiën.
6. Loop 6 keer om de taofel.
7. Gao zeuven vak-kies aachteruut.

8. Doe een klokke nao die 8 ure slat.
9. Kiek op een échte klokke en zeg hoe laete et is.
10. Hool 10 tellen je aodem in.
11. Gao 7 plakken aachteruut en 4 veuruut.

12. Gooi 3 keer. As dat mit mekere 12 is, meuj' naor de belle.



MOBILE



In de Skandinavische lanen, hiel veer bi'j oons uut de buurt, ziej' in de huzen veul moblies en ere raemversierings hangen. Die bin allegere maekt van bodpepier (karton) in alderhaande kleuren.


Van drie van de inlegvellen van dit kraantien kuj' ok zoe'n hanger maeken. Mar veurdaj' die uutknippen en ophangen kunnen, moej' him eerst hielendal kleuren. Aj' alles kleurd hebben (en van al dat kleuren niet al te muui binnen!) knip ie alle clowns, de twee tentedien en et rontien uut. Zet de tente vervolgend in mekeer, deur de gleufies in mekaander te schoeven.

Vouw de vouwraanties die an de tente zitten, en smeer d'r een betien liem op. Plak dan et rontien op de mit liem insmeerde lippies. Prik mit een prikpenne een gattien in alle zwatte stippies in de musse van alle clowns en in de buterste hoeken van de tente. Et is de bedoeling dat an elke hoeke een clowntien komt te hangen.

Tot slot prik ie een gattien in et bovenste van de tente. Daor doe' dan een draotien deur, daor aj' de mobile an ophangen kunnen. Waj' now alliend nog doen moeten is een mooi plakkien opzuken daor de mobile hangen kan. Dat kan bi'jglieks in de woonkaemer wezen, of in de keuken, mar ie kun him vanzels ok op een mooi plakkien in schoele ophangen!







Pyramide


Op dit inlegvel ziej' een deusien. En et is niet zomar een deusien.
Et is een deusien waor aj' je speercenties in beweren kunnen!

Ie moe'n et zó maeken:

Om te beginnen kleur ie alle plaeties.

Knip dan et zwatte rechthoekien uut, dat op iene van de ziedkaanten
van de pyramide staot.

Aj' dat allemaole daon hebben zicht de pyramide d'r zó uut:



Vervolgens moej' alle stippellijnties vouwen en een betien
liem op de plakraanties smeren. Plak dan et deusien in mekeer.

